

每週經課朗誦經文(巴克禮漢羅/教羅)2014/04/13

共同經課 - 1

以賽亞書五十四章四節~九 a 節

4 主耶和華賞賜我受教示 ê 舌, hō 我知怎樣用言語扶助厭倦 ê 人; 主 tak 早起叫醒, 叫醒我 ê 耳孔, hō 我能聽, 親像受教示 ê 人一樣。5 主耶和華開通我 ê 耳孔, 我並無違逆, 亦無退後。6 人 phah 我 ê ka-chiah-phiaⁿ, 我 chhut-chāi 伊 phah; 人 chhoah 我嘴 phoé ê 嘴鬚, 我 chhut-chāi 伊 chhoah; 人凌辱我, kā 我 phùi-noā, 我亦無掩面。7 因為主耶和華的確幫贊我, 所以我無見笑; 為 tiòh án-ni, 我 hō 我 ê 面硬親像 tēng 石; 我亦知我的確無致到漏氣。8 稱我做義 ê 近 lah; chī-chūi kap 我相爭? 伊 thang kap 我相 kap khiā; chī-chūi 做我 ê 對敵? 伊 thang 就近我。9 看 ah, 主耶和華 beh 幫贊我, chī-chūi 能定我有罪 ah?

共同經課 - 2

詩篇三十一篇九節~十六節

9 耶和華 ah, 我 tī 患難中, 求你憐憫我; 我 ê 目矚因為憂悶 phah-pháiⁿ, 我 ê 心神, 我 ê 身體, 亦是 án-ni。10 我 ê 性命因為憂苦來消無, 我 ê 年歲為 tiòh 吐氣亦 án-ni; 我 ê 氣力因為我 ê 罪惡來衰 lám; 我 ê 骨頭亦枯焦。11 我因為我一切 ê 對敵成做凌辱; Tī 我 ê 厝邊 tau koh-khah 傷重; hiah-ê bat 我 ê 人 lóng 驚我; Tī 外面看見我 ê 人走閃離開我。12 我親像死人 hō 人 boē 記得, 無人 siàu 念; 我親像破碎 ê 器具。13 因為我聽見 choē-choē 人 ê 謾謗, 四圍 lóng 是驚惶; In 相 kap 參詳攻擊我 ê 時, 就計謀 beh 害我 ê 性命。14 耶和華 ah, 我猶原 oá 靠你; 我講, 你是我 ê 上帝。15 我 ê 遭遇 tī 你 ê 手; 求你救我脫離我 ê 對敵 ê 手, 以及窘迫我 ê 人。16 求你 hō 你 ê 面照光你 ê 奴僕; 照你 ê 慈愛拯救我。

共同經課 - 3

腓立比書二章五節~十一節

5 Lín tiòh 有基督耶穌 ê 心做心; 6 伊本有上帝 ê 形狀, 無掠 kap 上帝平等做所 tiòh 執守 ê, 7 反 túg piàⁿ 空家己, 取奴僕 ê 形狀, 成做人 ê 樣相; 8 已經有親像人 ê 款式, 就屈家己, 順服到 tī 死, 甚至死 tī 十字架。9 所以上帝高升伊極高, 賞賜伊 hit-ê 名, poāⁿ 過 tī 萬名 ê 頂面 ê; 10 hō 見若 tī 天, tī 地, kap tī 地下 ê, tī 耶穌 ê 名, 無一個腳頭 u m 跪拜, 11 無一個嘴 m 稱呼耶穌基督做主, 來歸榮光父上帝。

共同經課 - 4

馬太福音二十七章十一節~五十四節

11 耶穌 khiā tī 總督 ê 面前; 總督問伊講, 你是猶太人 ê 王 mah? 耶穌 kā 伊講, 你講, 就是。12 伊 hō hiah-ê 祭司頭長老告, 伊也無應。13 Hit 時, 彼拉多 kā 伊講, Hiah-ê 人干證你到 hiah choē 項, 你無聽見 mah? 14 耶穌無應伊一句話, 致到總督大奇怪。15 到節期總督照例放一個犯人 hō 眾人, 是照 in 所 ài ê。16 Hit 時有出名 ê 犯人, 名叫巴拉巴。17 In 已經聚集, 彼拉多 kā in 講, Lín ài 我放 chī-chūi hō lín? 是巴拉巴, á 是稱做基督 ê 耶穌? 18 因為知 in 為 tiòh 怨妒 chiah 解送耶穌。19 伊坐堂 ê 時, 伊 ê bó 差人 kā 伊講, Chit-ê 義人你 m-thang 干涉 tiòh; 因為我今 á 日 tī 眠夢中為 tiòh 伊 choē-choē 艱苦。20 Chiah-ê 祭司頭 kap 長老 kiau-so 眾人, 求放巴拉巴, 滅耶穌。21 總督應講, Chit 兩人 lín ài 我放 tá-lóh 一個 hō lín? In 講, 巴拉巴。彼拉多 kā in 講, 22 Án-ni, 就稱做基督 ê 耶穌, 我 tiòh 怎樣辦伊? In lóng 講, 釘伊十字架。23 總督講, 怎樣, 伊有行甚麼 pháíⁿ? In 大聲 hoah 講, 釘伊十字架。24 彼拉多看見無 chhái-kang, 反 túg ná 擾亂, 就捧水, tī 眾人 ê 面前洗手, 講, Tī chit-ê 義人 ê 血我無罪, lín 家己打算。25 百姓 lóng 應伊講, 伊 ê 血歸 tī 阮 kap 阮 ê kiaⁿ 孫。26 伊就放巴拉巴 hō in。已經鞭 phah 耶穌, 就發交去釘十字架。27 Hit 時總督 ê 兵帶耶穌入公堂, 聚集 thong 營圍伊。28 Thng 伊 ê 衫, 將紅袍 kā 伊穿; 29 用刺 á 邊 7 冕旒, ti tī 伊 ê 頭殼, 用蘆竹 hē tī 伊 ê chiáⁿ-手, 跪 tī 伊 ê 面前戲弄伊講, 猶太人 ê 王, 平安。30 就 kā 伊 phùi-noā, kiáh hit 支蘆竹, 來 sut 伊 ê 頭殼。31 戲弄 soah, hit 領袍就 kā 伊 thng 起來, 將伊家己 ê 衫 kā 伊穿, 帶伊去釘十字架。32 出來 ê 時 tú-tiòh 一個 Kó-lī-nāi 人名西門, 勉強伊 saⁿ-kap 去, hō 伊 giá 耶穌 ê 十字架。33 到一所在, 名各各他, 就是頭殼碗 ê 所在, 就用苦膽所調和 ê 酒 hō 伊 lim; 34 伊試看, 就 m lim。35 已經釘伊 tī 十字架, 就做鬪 pun 伊 ê 衣服; 36 koh 坐 tī hia 顧守伊。37 就 hē 斬條 tī 伊 ê 頭殼 ê 頂面, 寫講, chit-ê 是猶太人 ê 王, 耶穌。38 Hit 時, 有兩個賊 kap 伊同釘 tī 十字架, 一個 tī chiáⁿ-pêng, 一個 tī tò-pêng。39 經過 ê 人譏刺伊, 搖頭講, 40 你毀壞殿, 三日 koh 起 ê, tiòh 救家己; 你若是上帝 ê Kiáⁿ, tiòh tui 十字架落來。41 Hiah-ê 祭司頭 kap 經學士以及長老也是 án-ni 戲弄伊, 講, 42 伊 bat 救別人, boē-oē 救家己。伊做以色列 ê 王, taⁿ tiòh tui 十字架落來, 阮就 beh 信伊。43 伊 oá 靠上帝, 上帝若歡喜伊, taⁿ 就 tiòh 救伊; 因為伊講, 我就是上帝 ê Kiáⁿ。44 Kap 伊同釘 hit 兩個賊也是 án-ni 罵伊。45 Tui 日中晝到三點, 遍地烏暗。46 差不多三點, 耶穌大聲喉叫講, Í-lī, Í-lī, liáp-má sat-pok-tāi-nī, 就是講, 我 ê 上帝, 我 ê 上帝, 你啥事放離我? 47 邊頭 khiá 7e5 有人聽見就講, 伊 teh 叫以利亞。48 中間一人即時走去, thèh 海絨, 浸醋, hà tī 蘆竹 á 尾, hō 伊 suh。49 其餘 ê 講, 且慢, 看以利亞來救伊 á 無。50 耶穌 koh 大聲喉叫, 就斷氣。51 忽然殿內 ê 帳, tui 頂到下, 裂做兩 pêng; 地動, 石磐裂; 52 墓開, 已經 teh 暈 ê 聖徒, in ê 身軀 choē-choē 起來, tui in ê 墓出; 53 到耶穌 koh 活了後, in 入聖城, 出現 tī choē-choē 人。54 百總 kap 相同顧守耶穌 ê, 看見地動, kap 所經過 ê 事, 不止驚, 講, Chit-ê 果然是上帝 ê Kiáⁿ。